

四庫全書

史部

欽定四庫全書

欽定盛京通志卷六

聖製

六

世宗憲皇帝御製文

勅諭

欽定四庫全書

卷六

欽定四庫全書

欽定盛京通志卷六

聖製 六

世宗憲皇帝御製文

勅諭

諭領侍衛內大臣等

雍正元年六月二十九日

奉天地方乃我國家啓祥之所甚屬緊要朕前詣奉天
聞地方人言論悉知兵丁差役煩多不能休息之處曾

降諭旨令將軍唐保住將無用塘哨悉行撤退唐保住雖將無用塘哨撤退而將軍副都統於定額親隨兵丁之外多帶百餘人省城官員又各帶其子弟因而屬員效尤各多帶兵丁以致應差乏人兵丁仍多勞苦又於鎗手中以選擇熟練之人為名每城調取二三十人田獵夫省城相隔遙遠往返人馬俱疲再自山海關以至廣寧皇莊頭三百有奇止交筆帖式領催等微末人員駐劄中後所催徵錢糧辦理事務以致交結匪類糴賣

官糧漁利入己且自中前所至錦州義州廣寧等處相隔二三百里詞訟案內干連之莊頭地方官調取抗不赴審即使到案亦抗不遵行以致案內遵行之人每多苦累再人命案件呈報地方官之後雖相距數百里亦必俟筆帖式領催檢驗炎暑日久難以憑信則百方檢驗慘不可言朕之所聞如此從前雖每年派卿員前往管轄莊頭因不實心辦理於地方並無裨益應遣大臣一員駐劄於寧遠錦州大凌河等處地方令其料理一

應公務管轄里長獵戶遇有詞訟事件會同地方官審結此所遣員官應令駐劄何處著領侍衛內大臣等兵部總管公同詳議具奏

諭工部

雍正二年十一月十四日

盛京

陵寢所需物料典禮攸關理應敬謹允禩等議稱

陵寢所用紅土折銀發往彼處採買可省腳價此特允禩

存心陰險欲加朕以輕

陵工而重財物之名也此議不可准行所用紅土著仍在京採買好者運送應用如有不肖官員串通部員不將紅土領運折銀携往本處採買定行重治其罪

諭盛京將軍等

雍正三年四月十二日

邇來盛京諸事隳廢風俗日流日下朕前祭

陵時見盛京城內酒肆幾及千家平素但以演戲飲酒為事稍有能幹者俱於人參內謀利官員等亦不以公務為事衙門內行走者甚少其聚會往來不過彼此相請

食酒肉嬉戲而已司官竟有終年不一至衙門者堂官亦置若罔聞坐臺之人看守邊口俱係關東人伊等雖有押送罪人之差而當兵者全無當兵之實為官者亦無為官之道朕深知此等陋習雖降諭旨數次竟不悛改因將將軍大臣內不及者革退另簡爾等補授爾等雖係新任但能留心細訪即便知之應將盛京陋習極力整飭令其悛改復還滿洲舊日儉樸風俗勤學騎射武藝若有惡亂之人即加重處以儆其餘將軍大臣其

欽遵朕旨與下屬官員同心協力各自黽勉力改從前陋習再盛京地方乃本朝創業之地關係甚重爾等將聚集惡亂之人不時稽查應逐去者作速逐出境外大臣等若仍相推諉不實心効力朕訪聞治罪之時勿復怨悔

諭吏部兵部刑部

雍正五年三月二十六日

盛京人員習氣澆薄營謀鑽刺朋比侵盜甚是無恥屢加教誡終不悛改皆緣犯法參革究治之後仍在本地

居住往往生事滋擾誘人為非無所不至此等敗類若不即令遷移望風俗之歸於淳厚終不可得嗣後盛京居住滿洲蒙古漢軍文武官員除因公誥誤獲罪者仍許本地方居住外其犯侵盜虧欠錢糧及姦貪訛詐之事降革者酌其所犯事由或令來京歸旗或著於各省滿洲駐防之處安插如此則不肖之徒漸少而盛京澆薄之習可息爾三部嗣後凡遇盛京人員犯罪案件俱照此定擬仍將從前盛京旗員所犯侵盜錢糧姦貪訛

詐等案內廢員查明奏聞

諭兵部

雍正七年八月十二日

盛京旅順地方雖設有水師官兵而俱不能諳練水師事務若無教習之員恐其有名無實著福建水師提督藍廷珍於千總內揀選數員於兵丁內揀選數名熟諳水師者令赴盛京交與該將軍令其教習旅順水師官兵其由福建起身之時著該督撫照資助送往浙江湖廣弁兵之例給與盤費

諭戶部

雍正七年九月三十日

據奉天將軍多索禮奏稱今歲盛京秋成大稔禾稼瓜菜等項俱獲豐收米糧價賤朕思米穀者乃

上天恩賜以養育萬民者也若人人存心敬受

天賜隨時撙節常留有餘崇儉去奢謹身節用則

天心必垂默佑雨暘時若俾受享盈寧之奉若暴殄天物

輕棄五穀不思稼穡之可寶罔念農事之艱難則必上

干

天怒而水旱災祲之事皆所不免此從來天道人事之斷
然不爽者奉天地方百穀順成已八年於茲矣今歲收
成又慶豐稔穀價之賤自昔罕聞朕心深為慰悅感戴
上天賜佑之恩則本地官民人等宜敬謹愛惜以仰承
天賜向來奉天居民有以米穀飼養豚豕之陋習此即暴
殄天物之一端已令地方官勸諭禁止不可因米穀饒
餘復蹈前轍積貯乃王政之要圖民生之切務奉天地
氣乾燥不比南方潮濕之區正當乘此豐收之時以為

儲蓄之計著該地方官員通行曉諭勸導所屬民人若有穀之家果能留心積貯至於穀多價賤難於出糶者著大臣官員等即行奏聞朕當發官價糶買或從海道運至京師俾積穀之實獲利益必不使有穀賤傷農之嘆也

諭內閣

雍正七年十一月三十日

奉天地畝向來多有隱匿每有三四畝報一畝者是以槩以上則徵科民力輸將甚為寬裕後因有隱匿積弊

民間互相爭競紛紛訐訟官民不便前歲朕遣大臣官員清丈漸次釐正田畝皆得實數今若按畝俱照舊則徵糧恐小民輸將無力著盛京戶部侍郎會同奉天府府尹確查田畝之肥瘠分別上中下三則起科酌定成額永著為令

諭內閣

雍正八年三月初三日

向來朕聞

福陵前面水法稍更故道祇以未得精通地理之人未敢

輕議上年福建總督高其倬陞見來京伊素精堪與之
學特命率同主事管志寧等前往奉天敬謹相度據奏
陵前水法因夏日溢口而流太近左畔山脚弓抱之勢微
覺外張應即行修理工倬循故道則水抱沙圓益增
吉慶等語朕覽高其倬等奏摺及所繪圖樣甚為明晰
惟是

祖陵工程關係重大著將奏摺圖樣發與滿漢文武大臣
等公同閱看將應否修理之處敬謹定議具奏

諭內閣

雍正九年二月初八日

據稽察寧古塔地方監察御史鄂昌奏稱原任奉天府永吉州知州杜薰因失察造印紙牌革職永吉州士民等紛紛具呈保留輿情迫切懇請代奏等語向來紳衿士庶保留本地官員者大半出於賄囑要結之私情而非愛戴攀轅之公道若允從其請則相率效尤弊端種種必為吏治民風之累是以屢頒諭旨槩行禁止今覽御史鄂昌所奏朕思永吉州乃極邊之地人情質樸非

內地可比況邊遠新設之缺况味蕭然官斯土者無可繫戀而民情若此則保留自出公心應當加恩於格外即該牧失察紙牌亦非不可寬宥之條著將杜薰仍留永吉州之任若居官果優佚三年之後著該府尹題請開復

諭內閣

雍正九年十二月十五日

據奉天府府尹楊超曾奏稱臣查奉天各屬從前一切公務類皆取給於里下總計一歲之科派多於正額之

錢糧如遇奏銷丁地驛站大造編審人丁大計考察官吏等項自臣衙門家人書吏以至治中知府州縣衙門均有陋規銀兩名為造冊使費歲考科試生童自府丞治中知府州縣衙門俱有陋規銀兩名為考費至大小官員到任則攤派修理衙署鋪設器用銀兩查點保甲換給門牌印捕等官則攤派紙張飯食銀兩以上諸項各州縣每項約攤派銀數十兩至百餘兩不等上司衙門既取給於州縣州縣復取給於百姓更有衙蠹里書

從中指一派十侵收已攬弊實多端臣訪聞之後即嚴飭各屬勒碑永禁并令嗣後如有上司衙門官吏索取前項陋規務使徹底澄清不許絲毫派累等語從來地方科派陋規甚為擾累該府尹楊超曾通行查禁辦理甚是但恐相沿已久官吏人等尚有陽奉陰違者又恐日久法弛將來接任之員或有仍襲從前之陋習者用是將楊超曾所奏宣示於外令奉天官吏人等永遠遵行以除積弊以惠閭閻

諭內閣

雍正九年十二月二十一日

福陵紅門前大路興

寶城甚近車馬俱由山根左畔行走有關風水著行文奉
天將軍府尹嗣後於渾河東南西南無關風水之處設
立船隻以渡行人

紅門前大路及山根左畔嚴行禁止行走再渾河以北凡
係風水之地所有草木不許擅動至遷移房屋禁止耕
種地畝著賞給房價補還地畝

諭內閣

雍正十年六月十六日

從前應行發遣黑龍江等處罪犯曾改發扎克拜達哩克等處令其開墾耕種後因伊等在彼甚不得力是以停其改發仍令照前發遣黑龍江三姓等地方上年賊人窺伺扎克拜達哩克時彼地所有罪人跟隨官兵守護城垣竭力捍禦甚屬可憫朕以加恩除其罪名令充綠旗兵丁入伍効力續據順承親王等奏稱伊等深知感戴朕恩共思黽勉可見有罪之人予以自新之路可

以望其改惡從善若發往黑龍江三姓諸處不過終身
為人奴僕而已朕意嗣後將發往黑龍江等處人犯改
發於北路軍營附近可耕之地令其開墾効力在伊身
可以努力自新而於屯種亦屬有益其如何遣發安置
之處爾等詳議具奏

諭內閣

雍正十三年五月初八日

三姓八姓渾春地方兵丁每年只支給餉銀十二兩著
照寧古塔吉林烏拉等處兵丁之例給與二十四兩全

分餉銀

諭內閣

雍正十三年六月二十九日

朕聞奉天地方凡事關旗民者俱送盛京刑部會審雖
司員會同有司承審實皆司員主稿乃奉天司員積成
陋習惟事威嚴一切人犯到案先將鎖鍊盤於地上令
其膝跪謂之跪鎖繼以荆條互擊其背任意敲打謂之
背花鞭又業無定限如上年八月間遼陽州民郭金美
毆死旗人裴玉亨一案白晝毆傷更餘隕命當日旗員

及知州會驗任聽屍親串同仵作混報多傷且傷痕寬
長逾格承審司員不即稟駁亦不揆情度理惟執定傷
痕刑夾供認草率定擬本年閏四月內葛森到任始駁
令另行驗審相距已十餘月尚未定案又筆帖式皆本
處生長之人所司者不過繙譯之事乃當審訊之時輒
亦列坐詰問此皆朕訪聞甚確者國家定例訊鞫人犯
必須審問情實其應用刑訊者自有一定規條今奉天
司員承審人犯一經到案不察虛實便以刑罰相加且

於定例之外創為跪鎖等項此從來所未聞者似此嚴刑重罰其中豈無冤濫至於筆帖式微員職司繙譯並無審刑之責乃公然列坐審詰命案有乖體制以上二事著嚴行禁止儻再蹈從前陋習經朕察出定將該堂官及司員等一併嚴加議處至辦理事件自有限期而人命等案關係尤重若無定限則拖累牽連之弊不可勝數嗣後應如何定以限期俾得永遠遵行之處著盛京刑部侍郎會同該將軍悉心定議具奏

欽定盛京通志卷六

欽定四庫全書

史部

欽定盛京通志卷七

七至九

少詹事_臣曹城覆勘

總校官編修_臣朱鈴

欽定四庫全書

欽定盛京通志卷七

聖製

世宗憲皇帝御製詩文

碑文

祭文

詩雅御集

欽定四庫全書

欽定盛京通志卷七

聖製

世宗憲皇帝御製詩文

碑文

重修北鎮廟碑文

雍正五年

國家敬共明神虔修秩望嶽鎮海瀆之祠罔不祇肅暨
平間山實為北鎮近接興京翊衛關輔曩者

皇考御書匾額以展褒崇復遣官修飭廟貌

御製碑文光昭奕代典至盛矣康熙五十九年朕奉

皇考命恭謁

祖陵於興京道經山麓躬詣展禮瞻仰祠廟蠲潔致禱因
捐貲庀工載加整葺嗣是雨暘時若禾黍有秋遼左黎
元咸沾嘉貺洎朕臨御之初復遣專官董司營治棟宇
榱桷丹雘一新雍正四年冬厥功告成朕惟茲山表自
虞書載在周禮蓋自天地開闢以來靈秀之所萃聚越

數千年神應彰顯而我

祖宗發祥闢左豐岐重地王氣所鍾惟神實為擁護永奠
鴻基靈蹟頻昭朕懷允愜敬共之念夙夜加虔神其弘
敷蕃祉益顯豐功俾方輿之內四序順成百嘉並遂風
雨慶其調和民物樂其康阜洪熙默贊歲事豐穰慰兆
庶依庇之心以稱朕愛育羣生肅奉靈祇之意式鐫琬
琰用昭示於億萬斯年

祭文

祭告長白山文

雍正元年

維

神天作崇高地鍾靈異發祥有自延祚無疆朕續受丕
基新承景命竊念

皇考膺圖以來百靈効順四海從風坐享昇平六十餘載
茲當嗣位之始宜隆祀享之儀特遣專官虔申昭告惟
冀時和歲稔物阜民安淳風徧洽乎寰區厚德長敷於

率土尚其歆格鑒此精誠

祭告北鎮廟文

雍正八年

維

神名著禮經位均方嶽峙興京之重地擁衛畿東炳福
國之明靈庇安遼左朕昔奉謁

陵之

命曾申詣廟之虔瞻望層楹遂捐貲而營葺紹我寶位復
發帑以增修煥丹雘其如新鐫青珉而紀事溯工程之

肇啟閱歲序之屢更十雨五風協休徵於泰運萬箱億
庾占瑞應於豐年神貺昭彰朕心感慶遣專官以將事
陳牲醴而薦馨所冀巖岫鬱葱奠鴻基之鞏固郊原膺
厚贊和氣以蕃昌惟爾

明神尚其歆鑒

祭大學士范文程墓文

雍正十一年

翊熙朝之泰運端重良臣稽冊府之鴻猷宜崇元祀蓋
成勞懋著生平之風概如存斯盛烈昭垂奕世之寵褒

益薦載申綸綍式薦牲醪爾范文程器宇超羣才猷間
代軍帷獻議贊一統之丕基文館陳謨佐萬年之鴻業
任專樞密內外之經緯咸周位重台司夙夜之籌謀悉
當於戲流芬竹帛卓然一代之完人樹範巖廊允矣千
秋之茂典列豆邇於祠宇渥澤攸隆布筵几於里閭湛
恩疊沛靈其不昧尚克歆承

詩

雍邱集

冬日

聖駕自塞外回鑾謁

陵恭紀

威德綏荒服

乘輿按部回歡聲
盈朔漠瑞靄被龍堆
鞭拂霜花淨旗飄

野吹開更遵

豐沛路

陵殿薦尊壘

侍從興京謁

陵二首

承先崇報本橋道駐龍旗萬國梯航集敷天雨露隨精
誠通寢殿肅穆奉宗彝敬仰松楸古昭森盛烈垂

其二

龍興基景命王氣結瑤岑不覩艱難迹安知啟佑心山
河

陵寢壯弓劍歲時深盛典叨陪從威儀百爾欽

陪京

新豐傳舊里今睹濯龍池天地開神輿山河啟

帝基金戈勞百戰玉葉衍千枝追遠

皇情切趨從仰孝思

登望海樓

極目澹滄海涵泓無所從量包天地外色染古今容浪
起思鯤化雲飛羨鶴蹤坐觀淵默裏萬派自朝宗

瞻仰盛京宮闕念

祖宗創業艱難恭賦二十韻

奉

命趨遼海倚歟仰舊宮逶迤龍脉遠詆蕩鳳城雄念昔開
洪造乘時建武功師征方自葛考卜重遷豐一劍風塵
際三陟指顧中神威宣率土

皇極協蒼穹式廓彌增壯維垣遂克崇八門連閭域雙闕
竦高空曳珮千官列輸環萬國同兵農咸定制禮樂漸

移風爰及純熙介覃敷景歷融寰區忻奠鼎故里抱遺
弓沛邑恩優渥春陵望鬱葱星躔爭拱北王氣本從東
綿瓊鍾靈盛凝庥後裔蒙

聖時殷孝享

勅諭遣微躬肅覩興京勝恭承祀典隆丕基勞櫛沐奕葉
荷帡幪松楸靈祇護檐楹肝蠻通

祖宗光烈在明發惕愚衷

曉度杏山

曙色催樵牧山崖徑鬱盤霜凝鴉背白沙印馬蹄乾海
氣籠朝旭林飈送早寒鳳城清漏隔遙憶

寢門安

望醫巫閭山

翠黛滿雲封遙看北鎮雄壯觀侔五嶽峻秩比三公葱
鬱興王氣扶搖廣莫風勒銘維

祖烈瞻仰萬年同

渡句驪河

遼水東西岸寒雲接渺茫平沙留雁跡堠火靖龍荒木
落晴巒出冰堅雪練長經時踈定省望日陟高岡

謁

福陵恭頌

一峯天柱象崑崙聖武開基百世尊

廟貌輝煌藏劍舄塵氛蕩滌闢乾坤赤龍遐舉雲留影石
馬宵趨汗漬痕赫濯聲靈通俊肅春秋霜露感長存

謁

昭陵恭頌

鍾靈毓秀氣佳哉宇宙從茲景運開

帝統兼因文治廣

聖基豈獨武功恢遼韓海水涵深澤松杏山高接上台虔
肅奉觴恭拜畢五雲飛處久徘徊

望海樓二首

凌霄雄傑聳層樓碧海蒼茫遠望收混一乾坤雲水闊
濯磨日月浪花浮百川輸委盈襟帶萬類涵濡任泳游

聞道此中覃帝澤幾曾汪濊有停流

其二

朱欄畫棟最高樓海色天容萬象收水底魚龍應變化
天中雲雨每蒸浮無波不具全潮勢此日真成廣漢游
仙客釣鰲非我意憑軒惟是羨安流

欽定盛京通志卷七

欽定四庫全書

欽定盛京通志卷八

綸音

皇上聖製

詔

勅諭

欽定四庫全書

欽定盛京通志卷八

綸音

臣等謹按帝王報本明禋禮隆原廟史記所稱
周武王九月上祭於畢上陵之禮實惟權輿欽
惟我

皇上寅紹

前謨觀揚

光烈御極以來以

盛京為天作丕基

錫類推

恩尺一所頒湛澤汪濊復以八年十九年四十年三謁
丹陵升禋禋福盡懋盡誠

蹕路經臨

賜蠲賜復仁膏疊沛

鳳綽宣傳莫不仰

綸言之淵穆欣

至教之覃敷洵乎

大聖人善繼善承求寧求莫之深衷足以昭示來許岳

裕萬年臣等謹裒集紀元以來所奉

諭旨為

綸音門次

列祖聖製後仰

盛德之雍容欽

聖謨之廣運

大文炳蔚實與典誥並煥云謹誌

綸音第二

欽定四庫全書

欽定盛京通志卷八

綸音一

皇上聖製

詔

聖駕詣

盛京恭謁

祖陵禮成恩詔 乾隆八年十二月

奉

天承運

皇帝詔曰朔原報本彌深追遠之情陳瑞薦馨式重
謁

陵之典我朝定鼎中原統一方夏重熙累洽海宇昇平聲
教覃敷民物康阜百年於茲緬惟

聖聖相承肇基中土

太祖高皇帝

太宗文皇帝誕膺景命式廓鴻圖遼海潘陽實為龍興之
地朕續承大統夙夜孜孜念

祖宗締構之艱難思

列聖燕詒之綿永盛京舊地瞻望

橋山敬考典章肅申思慕於乾隆八年秋恭奉

皇太后祇謁

永陵

福陵

昭陵大禮既成留都是蒞瞻

神丘之葱鬱仰

祖德之靈長爰沛德音用頒湛惠於戲謨烈顯承隆億年
之泰運恩膏沾被協萬國之歡心布告天下咸使聞
知

勅諭一

諭總理事務王大臣 雍正十三年八月二十七日

據署盛京工部侍郎七克新奏稱本年六月十三日
山水汎發漫溢

福陵石堤臣親身前往敬謹驗看得石堤堅固無庸補修
所有石堤前平地被水衝刷又引河壩西河崖衝開
一段併石堤背後所築之工亦被水衝刷應請敬謹
修理等語朕思

福陵工程風水攸關甚為重大從前

皇考特命平郡王前往會同該將軍等督率各員修理今所築土堤有衝刷之處或因從前修築時未曾妥協或當日辦事工員未曾悉照平郡王指授修理堅固或數年以來未曾歲加修築善為防護數者均未可定今既被水衝刷即應敬謹修補以資鞏固着派王子一人及大臣一員帶善看風水之人前往相度形勢將應修工程會同該將軍及盛京工部即行料估

敬謹督修并將從前經手熟練工員酌帶前往分委
襄事再

永陵堤工亦微有被水衝刷之處著派出之王大臣等一
併查看敬謹修補

諭總理事務王大臣 雍正十三年十一月二十五日
奉天

陵寢每年祭祀典禮關係重大向例止遣侍郎行禮朕思
世澤雖遠祖宗一脉相承必子孫虔奉明禋而後精

誠可格嗣後當於宗室中派公三人前往行祭祀禮
其應即在奉天居住或應每年輪班派往之處著總
理事務王大臣會同各旗王公等定議具奏

諭總理事務王大臣乾隆元年正月二十八日

朕恭謁

祖陵敬瞻

殿宇規模宏整妥脩攸昭惟是根題升麓多閱年所似應
重加藻飾以肅觀瞻但

陵寢關係重大宜詳稽典制敬謹酌議方可舉行朕思
祖宗福祿綿長萬年垂裕

山陵廟貌

靈爽式憑為子孫者以時修葺庶足以展孝思如典制應
行則追遠崇先誼當均切

永陵

福陵

昭陵殿宇並應一體修繕著總理事務王大臣敬謹定議

具奏

諭總理事務王大臣乾隆元年九月十三日

發給黑龍江寧古塔等處披甲為奴之犯原係叛逆
及強盜減等者此等皆罪惡重大寬免其死發令為
奴已屬法外之仁而伊等克惡性成仍復犯法是以
定有聽伊主打死勿問之例乃聞各處披甲人等竟
有圖佔該犯妻女不遂所欲因而斃其性命者情甚
可惡且其中有曾為官職生監而亦受凌辱漫無區

別情實堪憫著各該將軍等查明現在為奴人犯內
有曾為官職及舉貢生監出身者一概免其為奴即
於戌所另編入該旗該營令其出戶當差並出示曉
諭披甲人等俾其痛改舊習倘仍有圖佔犯人妻女
因而致斃其命者查出仍行照律治罪而為奴人犯
亦不得捏詞挾制伊主嗣後法司定案除真正反叛
及強盜免死減等人犯外其職官舉貢生監等有罪
應發遣者不得加以為奴字樣如何分別定例之處

該部詳議具奏

諭總理事務王大臣乾隆元年十二月初七日

朝鮮歸順我朝恪守藩封之職累世恭謹向來八旗
臺站官兵於每年二八月間攜帶貨物前往中江與
朝鮮貿易朕思旗人等但有看守巡查之責原無暇
貿易且亦不諳貿易之事遠人到邊恐致稽遲守候
多有未便嗣後著內地商民與朝鮮國人貿易即令
中江稅官實力稽查務須均平交易毋得勒捐滋擾

以示朕加惠遠人之至意該部并將此傳諭朝鮮國
王知之

諭內閣 乾隆三年八月二十五日

今年直隸各州縣收成豐歉不一米價未免稍昂而
奉天山東二處年歲俱獲豐收從來隣近省分必須
商賈相通以豐濟歉則需穀者既得以餬口而糶穀
者又藉以營生殊屬兩便之道但奉天山東俱屆海
濱地方官吏因向有禁米出洋之例未肯任從民便

用是特頒諭旨奉天山東沿海地方商賈有願從內
洋販米至直隸糶賣者文武大員毋得禁止但商賈
米船放行之時該地方官給與印票仍行文知照直
隸總督其沿途巡海官弁亦時加查驗毋令私出外
洋米船既抵天津卸米之後直隸地方官給與回照
仍行文知照奉天山東兩省俾米穀流通以副朕軫
恤民瘼一視同仁之意該部即行文奉天將軍府尹
山東巡撫知之

諭內閣乾隆三年九月十八日

奉天所屬旗民交涉案件查向例由地方旗民官彙具案情申送刑部審擬但奉屬地方遠近不一應質人犯多屬牽連該部提審駁查往返道路擔延時日拖累無辜弊端種種夫地方官身既親民駐劄本境平日習知人情臨時自易體訪若令會同就近旗民官承審定擬止將有罪人犯解部覆訊定案其一切牽連對質之人於審明之日即行省釋則人犯既免

金匱要略卷八
拖累而案件亦得速結但府州縣遠近不一其餘地方旗民官如何會同審理可以定為成例永遠遵行之處著奉天將軍刑部侍郎府尹會同詳查定議具奏

諭內閣乾隆四年九月初六日

朕奉

皇太后懿旨欲叩謁

祖陵以展誠切朕奏奉天路遠且俟一二年之後今年請

先謁

孝陵

景陵行禮已蒙

俞允其起程日期着欽天監選擇具奏一切應行事宜着
各該管衙門先期備辦

諭軍機大臣乾隆五年四月初十日

據奉天府尹吳應枚奏稱奉天自開例捐監積穀以
來報捐者寥寥無幾蓋緣直隸山東各省水陸俱通

商賈絡繹有穀之家俱各貪圖貴糴瞻望不前請照
江西安徽二省奏准之例凡外省來瀋行商過客暫
時流寓之輩並作官之生俊人等皆許其照例報
捐俾所積益多則所濟益廣似可無拘年限等語各
省捐監積穀一事原以備民間之緩急先據福建巡
撫王士任以本省捐穀無多請准行商過客及暫時
流寓之輩一體報捐以資積貯朕降旨允行續據江
西巡撫岳濬援例以請朕亦允行又據安徽巡撫陳

大受援例奏請並添入作宦之生俊字樣朕因安徽等屬連歲歉收從廣儲米穀起見且有福建江西為例故亦並照所請行是朕一時踈畧處乃吳應枚遂援以為例具摺陳奏今細思之作宦之生俊在該地方一體報捐其中大有弊竇或多收民人穀石以填補子弟捐監之數或少交入倉穀石以致有虧捐款之額或挪移常平社倉官穀以充捐項之用或碍上官情面代為騰挪而開虧空之端此皆事之所不免

者此事若准行將來何者不援此例請行乎況奉天
地方非江南等省可比行商過客亦屬無多有何益
處且朕從前為閩省所降諭旨原係一年期滿將外
籍報捐之人停止今吳應枚摺內並未定有年限但
稱俟缺額穀石捐足之日奏請停止是停捐遥遥無
期矣從前之收穀原欲濟民之食今如此辦理是又
巧開一捐納之途矣況吳應枚奏稱有穀之家貪圖
貴耀此彼地情形也今又准作宦之生俊一體報捐

則交官之穀愈多穀價豈不愈貴乎所奏甚屬錯繆
其作宦生俊報捐之處不但奉天不可行即安徽亦
不可行著該部即行文停止至於奉天地方應否准
行商過客報捐着該部定議具奏

諭內閣乾隆八年五月初一日

朕恭奏

皇太后前往奉天叩謁

祖陵擇於七月初八日啟行一切應行事宜着各該衙門

金匱要略卷八
先期備辦

諭內閣乾隆八年五月二十四日

奉天乃我朝發祥之地

歷朝實錄俱應繕修滿漢文各一部送往尊藏俟現在

皇史宬內閣藏本寫成後即着在館人員敬謹繕寫其送
往儀注大學士會同禮部詳議具奏

諭內閣乾隆八年七月十八日

朕奉

皇太后前往盛京恭謁

祖陵所有經過州縣不令絲毫擾累但安營除道未免有
資民力朕心軫念著直隸總督高斌奉天府尹霍備
查明各該地方本年錢糧應徵數目請旨蠲免以昭
朕體恤閭閻之至意

諭內務府 乾隆八年九月二十四日

朝鮮列在外藩世篤忠貞謹守侯度今因朕親詣盛
京恭謁

祖陵該國王遣陪臣齎表朝貢具見惻怛宜格外加恩以
嘉恭順其應如何錫賚之處著內務府總管議奏所
遣陪臣如何賞給亦著察例一併議奏

諭禮部 乾隆八年九月二十四日

朝鮮使臣入貢係國王族人稱君者始召見其餘祇
賜宴於禮部此定例也朕明日宴諸王大臣官員於
崇政殿朝鮮使臣亦著與宴以外藩陪臣得廁朝臣
之末係朕格外殊恩該部傳諭使臣知之

諭內閣乾隆八年九月二十四日

盛京戶部莊頭每年交納糧石預備

陵寢祭祀各項供應外其餘交收入倉以為撥給各處匠役口糧之用今朕恭謁

祖陵親詣盛京軫念各莊頭終歲勤苦輸將無悞著將乾隆八年分應交倉糧一萬餘石加恩寬免其各處匠役口糧著於舊存倉糧內撥給再各莊尚有乾隆七年分未完米荳草束俱著該部查明一併豁免以示

朕優恤旗莊之至意

諭奉天府尹霍備等乾隆八年九月二十八日

盛京為王化始基之地自昔人心淳厚風俗敦龐甲於天下但旗民雜處恐無知之輩尚存畛域之見殊非一道同風之盛惟在該管大臣董率有方則兵民自知觀感府尹一官為各屬地方有司之統領其所職掌亦不甚繁凡有旗民交涉事件務須與將軍等和衷商確一秉虛公則諸務自能妥協倘先存一為

旗一為民之見則意見參差辦理錯悞既失寅恭之義何以端人心而厚風俗乎此於根本重地甚有關係故特降旨訓諭該府尹霍備等知之

諭內閣乾隆八年十月初一日

朕恭謁

祖陵巡幸盛京所有奉天府屬錢糧及各莊頭糧石俱已豁免尚有盛京等處旗地未得沾恩着將盛京興京遼陽牛庄蓋平熊岳復州金州岫巖鳳凰城開原錦

州寧遠廣寧義州等十五處旗地應納本年米豈草束免徵一半其乾隆七年以前積欠與七年分因災緩徵之項俱著該部查明一併寬免再盛京尚維邦耿化祚名下壯丁應交本年丁米及上年緩徵米石亦著一例免其輸納俾旗民一體邀恩普沾惠澤該部即遵諭行

諭內閣乾隆八年八月十七日

奉天將軍額洛圖因朕恭謁

祖陵經行口外恐扈從人衆沿途米糧不敷供給奏請巡
幸之先禁止米糧入關今已回鑾自應開禁通商第
恐各處關口胥役人等仍或借端阻遏希冀勒索以
致米糧一時不能流通著該將軍府尹等即速行文
關口各員弁稽查胥役毋許借端阻遏并出示曉諭
關外商民聽其運往關內各處販賣俾米糧流通民
食充裕以副朕病瘼民瘼之至意

諭內閣 乾隆八年十二月二十日

據盛京兵部侍郎春山奏稱盛京等處驛站每年大驛
各出銀十六兩小驛各出銀八兩餽送侍郎盤費又
出銀四百兩餽送正副監督此外逢節又有規禮其
二十九驛驛丞一年所得俸銀三十餘兩又皆賂遺
侍郎合計有一千餘兩凡此皆係驛丞自送因而驛丞
有所恃以無恐將錢糧任意花費雖馬匹疲瘦短少
侍郎與監督俱置不問等語餽送陋規原干例禁盛
京陋習相沿料非一任若事窮究未免拖累多人今

姑寬其已往嗣後著永行革除如有再蹈前轍者必
從重治罪至於各省驛站或有此等情弊亦未可定
向來設有巡察御史稽查今巡察既裁督撫更當留
心查察使積習漸除驛務不致廢弛若日久弊生或
經科道糾參或欽差大臣經過查出朕惟爾督撫是
問該部即遵諭行

諭兵部乾隆十一年七月二十一日

莽牛哨添設官兵巡查一案前據部議應再令該將

軍悉心妥酌續據達爾當阿奏稱令熊岳副都統西爾們親往查看設汛之處與朝鮮實不相通無慮混雜滋擾且於內外俱屬有益經部覆准朕已允行茲據該國王陳奏前來以墾土設屯於伊國未便朕又勅交部議該部以毋庸議覆奏朕思我朝加恩朝鮮從來優渥今莽牛哨添設官兵巡查一事既經西爾們查明與該國界址無慮混雜滋擾且於內外俱屬有益而該國王又陳奏其不便情詞懇切究未知該地

實在情形如何著兵部尚書班第馳驛前往率同西爾們將彼地情形詳加察勘如果設汎之處係中國界內與該國毫不相涉則設兵置汎以杜奸宄所以肅靜邊防自屬應行之事即該國王懇請亦不便准行若其地界或有犬牙相錯難免混淆之處亦即據實奏聞候朕另降諭旨至從前議准達爾當阿所奏展邊墾土一案該國王既稱鳳凰城樹柵之外向留空地百餘里務使內外隔截以免人烟湊集混雜滋

事之患此事尚屬可行着將鳳凰城展柵之處照該國王所請停止並令該部傳諭該國王知之

諭內閣乾隆十一年八月二十六日

朕普免天下錢糧奉天省本年係輪蠲之歲各省定例止蠲地丁銀兩米豈不在應蠲之例但奉天省地丁錢糧向來銀糧並徵其額徵米豈即係正賦着將奉錦二府乾隆十一年應徵米豈一體蠲免該部即傳諭該府尹知之

諭內閣乾隆十一年八月三十日

從前奉天將軍達爾當阿具奏鳳凰城邊外莽牛哨
設汛一案經部議覆准行續據朝鮮國王李昉奏稱
與伊國不便朕降旨命尚書班第前往查勘今據班
第奏稱查勘得彼地在我朝界內與朝鮮國無涉雖
與該國人等共涉一江若彼此不准越界各自約束
所屬人等則不致滋擾永靖邊疆與伊國亦不無裨
益此汛理宜安設等語由此觀之欲設汛之處在原

定界址以內與朝鮮邊界無涉矣惟是該國王世戴國恩甚屬恭順若安設此汛彼國之無知小民倘有違禁者伊恐獲罪是以奏請其安設此汛之處雖有江灘分界兩岸不過一二里之遙相隔甚近如伊屬下人等不能遵奉該國王禁令以致該國王得罪朕心有所不忍著照該國王所請莽牛哨地方添設汛兵之處停止令該國王將伊所屬人等嚴加約束至於查拏內地偷越之人并應行呈報之處仍照原議

實力奉行不必交部再議該部即傳諭該國王知之
諭吏部乾隆十二年二月初二日

據寧古塔將軍阿蘭泰奏稱永吉一州設在吉林烏
拉係寧古塔將軍所轄地方該州向隸奉天府一應
辦理旗民事務俱申報府尹轉咨不但稽延時日且
於辦理事件多至掣肘請將永吉州改設理事同知
屬寧古塔將軍管轄等語著照該將軍所請永吉州
改設理事同知管理該州事務其作何裁改一應事

宜交與該部定議具奏

諭大學士等乾隆十二年三月十一日

向來直隸有歉收地方需用米石彼此商販有將奉
天米石由海道轉運內地者原屬應行之事至將奉
天米石運往山東惟雍正八年議行一次此後間有
歉收之年俱未舉行或因山東與直隸天津不同其
海道遙遠逼近外洋恐有奸商透漏接濟奸匪之弊
奉天上年有被水州縣即直隸天津等處運販亦停

止今趙青藜奏請令山東小民往奉天採買海運其
應否舉行之處着大學士會同該部詳悉定議速行
具奏

諭戶部乾隆十二年三月二十一日

大學士等照例議駁固是向來海禁甚嚴原以防奸
商透漏接濟奸匪之弊但東省上年被水地方目下
賑借各項需用米石倘奉天可以通商販運而稽察
嚴密不致偷越自於災地有益着行文詢問山東巡

撫阿里衮奉天將軍達爾當阿是否可行奉天米石
可以運往若干如何按數給照撥運東省如何驗照
稽查俾商販流通不致透漏而奉天米價又不至於
騰貴如果可行一面辦理一面奏聞此因東省偏灾
一時權宜之事嗣後不得援以為例該部速行

諭內閣乾隆十二年四月十七日

盛京等處巡察官員昨已降旨撤回令每屆三年該
衙門將應否差員之處請旨今思三年屆期一時差

遣未必得如許賢員應分別年分陸續差遣方為妥
協其巡察所至如彼處將軍以下倘有蠶蠶不飭政
事失宜官兵擾累及案件有無逾限皆該巡察等分
內應查之事遊牧地方各有大員管理其是否實心
任事挑補屬員有無屈抑并上駟院等衙門馬羣事
務是否妥協亦應一一查察於差竣之日將所查該
處三年內實蹟並地方現在情形逐一據實奏聞既
可具悉該處吏治民情廣明目達聰之益而巡察人

員之能否盡職即可定其殿最如此方於地方實有裨益而巡察不為虛設較之從前巡察人員但以注銷案件為事及差滿捫拾無關緊要條奏塞責者不可同日而語矣其如何分年請旨并定立巡察條款著大學士九卿會同詳悉妥議具奏

諭奉天將軍阿蘭泰等乾隆十五年八月二十四日

奉天辦理流民一案前經降旨從寬予限十年令無貲產者陸續回籍如已在奉省置有產業願編入奉

籍者即准入籍今據將軍阿蘭泰等摺奏流民內竟
有置有產業不願回籍而又不願編入奉籍者該將
軍等請以附籍之名曲徇其意辦理甚為不合或因
向來地方官辦理不善未經愷切曉示以致小民無
知遲疑觀望耳著再加恩展限十年令該將軍並地
方官等詳晰申明曉諭其在奉省本無產業者仍令
陸續回籍外若在奉省置有產業何不即入奉籍既
不欲回原籍而又不肯編入奉籍則是目無法紀怙

惡不悛矣限期一滿定當嚴行治罪決不姑貸餘依

議

諭禮部乾隆十五年十月三十日

禮部等衙門議奏十一月初四日恭奉

列祖聖容

實錄玉牒送往盛京尊藏屆期朕恭詣拈香行禮所有應
行儀注該衙門敬謹詳議以聞

諭盛京五部乾隆十八年四月二十日

盛京戶刑工三部郎中八缺內著留戶部一缺用本處人員其餘七缺並員外郎十六缺主事十七缺均以京員補用禮兵二部郎中四缺主事五缺均用本處人員員外郎八缺內著以京員補用兵部一缺其餘七缺留用本處人員

諭內閣乾隆十九年五月初七日

此次由熱河前往盛京恭謁

祖陵所有經過直隸奉天州縣地方加恩蠲免本年應徵

地丁錢糧十分之三着方觀承鄂保照例查辦該部
即遵諭行

諭內閣乾隆十九年八月初六日

朕恭奉

皇太后詣盛京恭謁

祖陵道經吉林念此地為我朝肇基所自風俗淳樸官兵
弓馬可觀尚能不忘舊習途次迎鑾者踴躍趨事具
見尊君親上忱悃篤摯朕用嘉悅今車駕肇臨所有

將軍大臣并官員兵丁人等應如何分別加恩賞賚
著總理行營王大臣速議具奏

諭內閣乾隆十九年九月初三日

朕恭奉

皇太后東巡展謁

祖陵所有經過地方賜復蠲租一循彛典尤念今年奉天
所屬州縣秋雨過多間被水潦雖高阜尚屬有秋但
朕巡歷所經念茲貧民拮据益當加意惠鮮無令失

所著該將軍府尹等查明被災地畝於恩旨蠲免外
應作何分別優恤之處即奏聞辦理

諭內閣乾隆十九年九月十二日

仰惟

列祖創業東土光啟萬年景運

山陵永峙

福佑靈長我

皇祖聖祖仁皇帝三詣陪京

躬親展謁禮成行慶典冊昭垂朕寅紹丕基時深景慕
自乾隆八年秋瞻仰

橋山迄今已逾十載追遠之誠常如一日本年七月恭奉
皇太后安輿由熱河啟鑾取道吉林巡歷遼瀋車駕所至
兵民各安本業風俗淳樸輦路懽懽迎扶攜恐後具著
忠愛惓惓仰見

先澤留貽久而益懋朕心深用欽懃茲於九月初五等日
謁祭

三陵大禮告成宜敷愷澤其將奉天所屬府州縣乾隆十九年地丁正項錢糧通行蠲復經過地方前旨所免十分之三及被水地畝應蠲錢糧仍於明年應徵額內補行豁除自山海關以外及寧古塔等處官吏軍民人等除十惡死罪外其餘已結未結一應死罪俱着減等發落軍流以下悉予寬免凡我留都士庶尚其敬念根本重地益務敦龐毋忘先民矩矱共享昇平之福永承樂利之休用稱朕加惠優恤至意

諭內閣乾隆十九年九月十二日

朕奉

皇太后鑾輿由吉林前詣盛京恭謁

祖陵所至地方多有年逾耄耄策杖歡迎者宜沛恩膏以彰盛典其奉天吉林所屬旗民男婦自年七十以上悉照從前恩詔之例分別賞賚用示朕引年優老至意

諭內閣乾隆十九年九月十二日

朝鮮國王李昉敬遣陪臣前詣盛京接駕賚表貢獻
誠悃可嘉著照乾隆八年例加恩賚賚所遣陪臣一
并照例加賞

諭內閣乾隆十九年九月十三日

朕奉

皇太后鑾輿再詣盛京恭謁

祖陵禮成奉天所屬府州縣乾隆十九年地丁正項錢糧
已降旨通行蠲復所有各莊頭及旗地應納糧石草

束等項自應一體加恩以溥愷澤着將盛京戶部各
莊頭本年應交倉糧一萬餘石槩行蠲免盛京興京
遼陽牛莊蓋州熊岳復州金州岫巖鳳凰城開原錦
州寧遠廣寧義州等十五處旗地本年應納米豆草
束免徵一半其各壯丁應完本年丁米亦著免其輸
納俾旗民均沾嘉惠用昭慶典

諭內閣乾隆十九年九月十四日

盛京為我朝龍興重地自定鼎以來設立五部侍郎

及奉天尹丞等官分理庶政教養旗民責任綦重且距京師僅千有餘里方今天下一家即在漢人中猶不應稍存擇地之見況滿洲世僕豈可遂忘報本世臣本屬庸材粗通腐文徒以資深擢用至盛京禮部侍郎乃其詩稿中至有霜侵鬢朽嘆途窮之句幾自擬於蘇軾之謫黃州試思以彼其品其才與蘇軾執鞭將唾而棄之且鄉貳崇階有何途窮之嘆又云秋色招人懶上朝寅清重秩自宜夙夜靖共乃以疎懶

鳴高其何以為庶寮表率又云半輪月色西沉夜應
照長安爾我家獨不思盛京固我豐沛舊鄉耶世臣
居心不可問如此則昨之革職發遣尚屬輕典夫縱
情詩酒最為居官惡習以滿員而官盛京尚抑鬱無
聊形諸吟咏則從前漢人之以出關為畏途又不足
怪矣此地風俗素淳甚恐為此輩所壞嗣後盛京各
官當深以此為戒其有不思敬供厥職妄以詩酒陶
情廢乃公事者朕必重治其罪可將此旨各書一通

懸之公署令觸目警心永垂炯鑒

諭內閣乾隆十九年九月十八日

朕由吉林至盛京周覽山川形勝敬稽

實錄所載仰見

列祖締造艱難維時宗室諸王克奮忠勤功成百戰開國
翊運之勲彪炳簡冊深切景念思盛京為龍興重地
國初諸王功烈懋著如此並宜建祠以酌舊勲而示
來許此地現有怡賢親王祠應將

太廟配享之通達郡王武功郡王慧哲郡王宣獻郡王及
禮烈親王饒餘親王鄭簡親王穎毅親王一併崇祠
即命曰賢王祠令所司春秋致祭應行典禮該部詳
議以聞祠內

世祖憲皇帝碑亭可移於正中並鐫勒此旨永昭我朝宗
功元祀之鉅典

欽定盛京通志卷八